



RS



Namba 139

Sarere, 15 Me, 1976

Prais 10t



# PAS I KAM LONG EDITA

## SPES BILONG OL MERI TASOL.

Dia Edita- Nau mi laik autim wanpela wari bilong mi. Long wanem, long S.H.P. mipela i gat planti yangpela draiva, na ol i laikim tumas wok bilong ol tru.

Mi save, ol draiva i gat wok bilong helpim wok bilong gavman i go het. Na ol i no moa bihainim dispela rul. Nogat na nogat tru!

Ol i raun long bikrot, bilong painim ol yangpela meri bilong mekim hambak pasin, na bilong kisim ol nating nating tasol.

Ol draiva, dispela kain pasin bilong yupela em i gutpela long laip bilong yupela? So plis yupela mas sekim gut tru nau.

Tu, ol pipel ol i save tromoi planti mani tumas long baim kaunsil trakta. Planti taim mi bin lukim na ol draiva ol i no save kisim wanpela man i laik i go long haus o long ples samting. Nogat tru.

Na ol i save pasim ka tu. Tasol, ol i no kisim dispela man. Long wanem ol i save tok: Nogat spes long kisim yu. Long wanem? Yu pulapim planti yangpela meri tumas? Dispela kain i luk olsem bel bilong ol lokal pipel i no gut tru.

Em bilong wanem, ol planti ka i save kisim bagarap long taim bilong ol i tromoi ston na brukim glas bilong ka. Em asua bilong yu draiva. Ating em i tru.

Plis, yu mekim olsem na yu yet i bagarapim dispela kantri bilong yumi. Yu mas skelim tingting bilong yu yet. Gavman i no kam long wanpela gutpela man tasol. Nogat tru ya ol wantok.

Gavman i kam long olgeta man; man nogut, gutpela man, rabis meri, gutpela meri, sik lepra man na meri, na sik man o wanem kain manmeri. Save long dispela "Pren laka." Putim gut long het.

Mi wanpela gutpela pren bilong yu na mi tokim yu stret long pes bilong yu. I no longtaim na ol man long ples bai ol i kilim yu. Was

gut. Plis sampela taim yu mas sevim laip bilong yu gut. Laip i bikpela samting.

Tenkyu tumas mi sevim laip bilong yu. Long wanem, mi man bilong stretim yu, na mi stretim yu. Sapos yu laik bekim pas bilong mi, orait, yu inap painim adres bilong mi. Em i stap daun-bilo hia. Lukim gut.

Mi wanpela boi i kam long Njenja viles insait long Poroma Patrol Pos, S.H.P. yet. 20 krismas tasol i sevim laip bilong yu. Tenkyu.

Mista Josep Rekilam,  
Erave/S.H.P.

## KANTRI YANGPELA YET

Dia Edita - Long taim independens i kamap pinis long Papua Niugini i kam inap nau mi harim sampela toktok nabaut olsem nami laik autim tingting bilong mi long Wantok Niuspepa i go olsem.

Dispela tok hia i "Taim Bilong Papua Niugini" o i ting dispela taim bilong PNG kisim olgeta bisnis na wok i stap. Tasol dispela tingting i no stret. Yumi bung o poroman wantaim ovasis man na wok wantaim. Long wanem yumi i no gat saveman yet bilong lukautim ol bikpela bisnis na faktori.

Tru, sampela arapela liklik samting olsem plantasin, lukautim kakaruk, bulmakau, kopra, kopi, na kakao. Em inap long yumi kisim na wok long en. Na ol draipela samting yumi tasol i no inap yet. Yumi poromanim ovasis man, kisim save, tingting na wok wantaim.

Na tu planti man i toktok nabaut long memba bilong ol long haus i no mekim gutpela wok na ol i tingting long makim nupela man sanap long ileksen. Sori: Olpela memba na nupela memba wanpela i no inap mekim wok stret tru. Nogat ya. Papua Niugini em i yangpela kantri yet.

Nupela memba bai hatwok na tingting bilong kirapim gutpela bisnis na gutpela sindaun bilong Papua Niugini. Na sapos ilektim nupela memba bai wankain olsem tasol. Olgeta bai hatwok. Yumi

i no inap long sasim wok bilong ol. Yumi yet i aninit long ol na hapim tok bilong ol na mekim wok bilong kirapim kantri.

Planti studen bilong Yuni-versiti i kisim save winim arapela. Na save bilong ol i bung wantaim ovasis man na ol sampela lida bilong PNG em inap long kirapim kantri hia. Sapos ol i laik mekim wok na tok: ovasis man i go bek long asples na mipela inap kisim ples. Sori. Em i kranki tingting.

Saveman bilong yumi i bung wantaim ovasis man em inap ranim dispela kantri i kamap gut. Papua Niugini studen bilong Yuni. i tingting gut na skelim gut rot em inap long helpim olgeta pipel na maski long tok: mi gat save na mi inap wok.

Papua Niugini saveman poroman tru wantaim ol ovasis man oltaim na wok. Bihain, kisim gutpela nem na gutpela sindaun. Long dispela taim yumi poroman wantaim Papa Australia na arapela kantri na wok bung wantaim em i kirapim Papua Niugini.

Yumi mas tingim olsem: Yangpela kantri, yangpela memba bilong haus, yangpela yunivesiti, yangpela gavman, yangpela pati, na arapela samting yumi laik mekim i yangpela tasol.

Yumi statim isi isi i go, i go bihain bai kamap bikpela na strong i gat kaikai na yumi sindaun wantaim amamas. Lusim kranki tingting.

Michael Maya,  
Lae.

## MASKI WOK LONG TAUN

Dia Edita - Mi laik bekim pas bilong wantok ya Lokoto O. bilong Maprik.

Yes pren, long pas bilong yu long Wantok Niuspepa bilong Epril de namba 3 namba 136, yu tok yu save lukim notis i tok nogat wok na yu save belhat tru. Orait, nau mi laik askim yu gen.

Bilong wanem tru yu laik wok na wanem eimoas bilong tok na yu laik go wok long taun. Mi ting yu laik wok bilong kisim mani.

Bilong wanem go long taun. Go bek long ples na wok bisnis o i go long vokesenel skul. Wanpela samting yu tok nogat wok long Papua Niugini tasol mi ting i gat planti wok tru i no long taun tasol long ples bilong yu. Tingting gut, maski mekim nating na bihain wari wari i stap.

Long pas bilong yu, yu tok yu wanpela standet 6 drop-out. Sori pren nau ol i tok man i gat bikpela save tasol i ken kisim wok long taun. Tasol sampela bai nogat. Yu tingting long ol na yu praimer drop-out na ol sekenderi tasol bai nogat wok long ol tu. Na pren i no ken wari nating. Tingting na bihain yu toktok.

Sapos yu askim papa bilong yu long stap wok long ples bai em i orait. Tasol taun bai nogat. Lukim pren maski westim taim bilong yu traim na wokim wanpela gutpela samting pastaim.

Yu husat rida o Lokoto yet i belpen long pas bilong mi rait tasol long Wantok Niuspepa. Tenkyu.

Rexman T. Kawi,  
Aitape.



## BIHAINIM MERI TOLAI

Dia Edita - Yes susa yu i tok tru gavman i no tambu. Tasol mipela ol man i lap long yu. Susa yu mas putim ai gut na lukim yupela ol meri i putim longpela trausis wantaim siot em i no stret. Yupela i mas bihainim ol meri Tolai.

Yupela yet i putim su na katim aigras na putim pen long pinga em i no stret. Na yupela putim su na woka-baut bilong yupela i olsem muruk. Mipela ol man i lukim yupela na lap. Mi tok ya yupela i mas harim na bihainim ol meri Tolai tasol.

Joseph Okun,  
Banz/W.H.P.

## FAMILI PLENG WAIP

Dia Edita - Wanem as tru ol i tambuim ol manmeri long i no ken karim pikinini. Mi bin ritim wanpela buk. Em i buk bilong Pablik Helt Dipatmen. Na em i tok: Olgeta manmeri i mas stapim ol meri long i no ken karim bel.

God em i no tambu long lo bilong karim bebi? God em i as tru bilong olgeta manmeri na bel isi. Em i tok, olgeta manmeri na ol animal na ol pisin na ol abus tu, olgeta i mas karim pikinini na pulimapim olgeta hap bilong graun. God em i wokim ol manmeri na ol animal, em i givim blesing long ol.

Taim gumi stap insait, em i ken slip wantaim man. Tasol i no inap karim bebi, olsem wanem? Dipatmen bilong Pablik Helt yupela i pasim ol. Meri i gat pil i no ken karim pikinini. Pil i save painim ol sik, het i pen. Raba bek sid, aiwara sid, bilong man. Man i laik slip gen, putim raba bek long wan san na wan nait.

Yumi no save wokim bebi long han. Nogat. Yumi man i go long skin bilong mama. Em tasol God i blesim long dispela. Blesing bilong God tasol bebi i save kamap.

Henry Auk,  
Henganofi/I.H.P.

## PLES EM I NAMBA WAN

Dia Edita - Yes hia mi gat liklik wari na mi laik bai ol brata bilong mi long dispela kantri Papua Niugini i ken ritim na kisim aidia long wanem samting mi tok long en. Pastaim long mi toktok, hia mi gat tupela poin.

1. Wok long taun o stesin.
2. Wok long ples.

Insait long tupela poin wanpela bilong en em mi save lukim na i no i stret long mi. Long ol sampela brata bilong mi i save tingting. Namba wan i gutpela long man i wok long taun o stesin em tu em bilong kirapim kantri bilong yumi. Namba tu em mi save lukim ol brata i save mekim em i no stret. Mi ting wok long ples em i namba wan samting tru.

Tasol sampela brata i save kam long taun na ol i save traim hat tru long painim wok. Planti man mi lukim

long ai bilong mi na planti ol i save kam na askim mi olsem:

Hey brata long ples yu wok long en i gat sampela wok i stap o nogat? Mi yet i save tingting na tok em i no stret. Man i save wok long taun i hat laip long ol man i save wok i stap long ples. Long wanem em i go olsem:

1. Wok long taun o stesin.
  - A. Wetim fotnait tasol.
  - B. Sapos yu let long wok o i no kam long wok wanpela de em bai ol i katim mani bilong yu na kisim liklik long fotnait em bai i no inap long famili.

- C. Sapos yu wokim trabel long wok o nabaut bai ol i rausim yu long wok. Em nau bai hat tru long kontrolim famili bilong yu.

- D. Lip on o stap bilong yu wantaim famili long kai-kai bilong stua tasol na tu i no malolo long spenim mani long kaikai.

2. Wok long ples.

Oh ples mi no ken tok, olsem yupela i save pinis, i no olsem long taun em ol samting mi listim long en. Nogat tru. Yu ken kisim kai-kai taim yu wok long gaden. Yu ken kisim mani long eni taim sapos yu wokim liklik kopra, kopi, na ol arapela wok bisnis olsem. I no inap long bai yu painim planti trabel long ples.

Na tu sapos yu planim ol krop o wokim liklik bisnis em i samting tru bilong kantri bilong yumi. Em i olsem bun bilong kantri. Sapos yu wokim olsem em mi ken tok inap long yu winim man i wok long taun. Em long man ya i kam askim wok o painim wok long taun.

Yu no ken tingting kranki olsem brata ya (Lokoto O. Wangilen) bilong Maprik, em long Wantok Nius namba 136, Sarere 3 Epril 1976.

Em i save belhat o kros nogut tru taim em i save lukim ol i save raitim notis na tok: "nogat wok" traim na statim sampela wok long ples na lukim bai i kamap o nogat. Mi ting bai yu moa yet sapos yu traim. Em tasol na yu husat brata yu ting mi tok stret, o giaman orait, skruim pas o kam long Wantok Niuspepa na mi ken lukim. Tenkyu.

S.M. Michael Mole,  
Wewak.

## TU MINIT TINGTING



### BOSIM LAIK NA YU INAP WIN

*"Ol man i laik win long resis, olgeta ol i save daunim olgeta laik bilong bodi bilong ol yet....Mi save boksen....mi save paitim tru bodi bilong mi na mekim em i bihainim laik bilong mi." (1 Kor. 25.27.)*

John Kokinai long poto antap, em i man bilong winim ol longpela resis tru. Tasol sampela taim em i no win. Na ol i bin askim em watpo em i no win. Em i tok: Bikos mi les liklik na mi no prektis. Mi no taitim bun long mekim ol hatwok. Olsem na lek bilong mi i lusim strong.

John i save, pasin bilong winim prais em i no kamap nating. Nogat. Man tu i pilai ragbi o soka, man i boksen olsem Martin Beni, em i save pinis. Sapos em i hatwok tru, sapos em i paitim bodi bilong em, sapos em i daunim olgeta laik bilong bodi na bosim em tru, em inap win. Sapos nogat. Em i lus.

Em i lo bilong winim pilai na resis; em tu i lo bilong winim heven.

Go long skul planti yia, em i no isi. Trening em i no isi. Bihainim lo em i no isi. Mekim wok em i no isi. Karim pikinini em i no isi. Karim hevi, karim sik, karim pen - em i no isi.

Tasol yu tingting nau. Yu lukim pinis wanpela gutpela man o gutpela meri tru? Ating yu lukim long ples o long skul o long wok. Nau long tingting bilong yu, bilong wanem ol i gutpela? Ating yu mas tok: bikos ol i save moa long bosim laik bilong ol. Ol i no manmeri bilong pinisim laik; nogat. Ol i manmeri bilong bosim laik - na olsem tasol ol i win na yu save laikim ol.

Em tasol i lo bilong kamap gutpela man o meri. Em i lo bilong God; em i lo bilong spot.

Sapos yu bihainim, bai yu tu inap win.

## TU MINIT TINGTING

# TEACHERS' CORNER

CULTURAL ACTIVITIES AND COMMUNITY DEVELOPMENT ....

## Do You Know Your Community ?

As educators of young children in the so called community schools, what are we really aiming at?

Are we aiming at giving each and everyone of the pupils we are responsible for, a full six years education in a community school?

How well do you know the Community in which you are teaching? For example:-

**FAMILY:** Who are important in the family?

What are the main occupations of the father?

Is the marriage a happy one?

Are there good relationships with the relatives?

### SUBSISTENCE:

What is the economic base of this Society?

How do people earn their own living?

What can they save?

Are they worried about prices?

How do they spend their money?

### EDUCATION: (in and out of school)

How are the children prepared for life?

What are the attitudes towards school?

What are difficulties of adolescence?

### DECISION MAKING:

Who has power & authority in the community?

How are decisions made?

Do women have a voice in decision making?

Are people satisfied?

Is an appeal possible?

### RECREATION:

How do people spend their leisure time?

What activities are prepared: Group? Individual?

### BELIEFS:

What beliefs or superstitions do people discuss?

How are their beliefs expressed?






*When you can answer the above questions, you will know the people in the community who will be best able to help you get your activities organised.*

*Have a flexible timetable but make sure that the official time allocation is followed.*

*If a village member comes to the school, arrange the class so that the situation resembles closely the village situation.*

# VOLCANOES

SCIENCE BROADCAST  
for Standard V and VI  
on May 24



# KILIM STRONGPELA MAN

stori bilong tumbuna

Wanpela taim wanpela man i bin i go wokim gaden bilong em long ples bilong em long "Airote". Long dispela taim, wanpela man i bin kism hap smok bilong em, em i bin smok long en pinis na i mekim posin long em na em i gat liklik sikinsait long bel bilong em.

Yu save ol "Sanguma" long tok ples bilong mipela i kolim "Devara" i skul moa long kain kain wok bilong ol long lukim man i sik na skin bilong em tu i olsem, olsem, em bai ol i kamap stret long yu na kilim yu. Olsem nau dispela man i go wokim gaden, na ol i kamap stret long em na kilim em. Namba wan taim ol i salim ol faivpela olgeta i kam pas, na pait wantaim em na em i kilim ol 5-pela olgeta insai. Yu save dispela man em i strongpela man tru olsem na em i kilim ol 5-pela sanguma olgeta indai long tamiok.

Olsem na olgeta "Devara" o "Sanguma" i belhat na ol i kam slipim em olgeta na bagarapim em. Bihain ol i kirapim em bek gen na ol i tokim em long kam na wetim mi long wanpela ples ol i kolim "Tamoni" na long dispela taim ol i kam bek gen long nait na ol i bagarapim em olgeta.

Tupela ai bilong em i taim pinis na ol braunpela ai tasol i kam ausait. Em i slip long bus inap long tupela de olgeta.

Na long neks de gen wan-




pela man nem bilong em "Aveni" wantaim meri bilong em "Pirinave" ol i laik i go long bus na ol i bungim em na karim i kam putim em

long kanu na bringim em i kam long nambis.

Olgeta manmeri i kam bung na krai long em. Dispela man em i dai pinis. Na long wan

klok ol i planim em. Em tasol long liklik stori bilong mi. Gut bai na tenkyu tru.

Killian T. Naime,  
Warapu/Sissano.



Wanpela man i wok long katim bus na baut long haus bilong em na em i no lukim wanpela man i go pas na i katim antap bilong hat bilong em. Tasol dispela man i wok long ritim Wantok Niuspepa na em i no save hat bilong em i bagarap. Em i lukim dispela 2-pela piksa long pepa na em i lukluk strong long painim 8-pela samting i narakain long tupela. Inap long yu nogat. Yu mas lukim gut 2-pela piksa na makim stret tasol.



# WANTOK RIPOK


SAPOS YU LUKIM OL MANI I  
LUS LONG WOKIM HAUS BAI YU  
PAINIM OLSEM:

Port Moresby: K5,786,000  
Arapela Papua: 438,000  
N.G. Nambis: 2,006,000  
Ol Ailan: 1,310,000  
Ol Hailans: 967,000

OLGETA WANTAIM: 11,204,000


Sapos yu lukluk raun long ol provins bilong Papua Niugini na yu lukim ol mani gavman i bin lusim long dispela yia i go pinis, long wokim olkain haus bilong ol wokman bilong en, bai yu kalap nogut.

Ating yu no bilipim, tasol em i tru - long olgeta 100 haus gavman i bin wokim, moa olsem 50 ol i bin wokim insait long biktaun Port Moresby tasol. Lukim gut dispela piksa daunbilo. Em i laik tok olsem, long olgeta 100 haus gavman i bin wokim, provins bilong yu i bin kisim hamas?




OL PAPUA PROVINS

Port Moresby tasol: 52 haus  
(K5,786,000)  
Noten, Galp, na Westen  
wantaim: Klostu 4 haus.  
(K438,000)



OL NIUGINI NAMBIS PROVINS

Morobe tasol: 18 haus  
(K2,006,000)  
Madang, Is na Wes Sepik  
wantaim: 6 haus  
(K697,000)



OL AILAN PROVINS

Manus, Nu Ailan, Is na  
Wes Nu Briten, na Bou-  
gainville wantaim: 11 haus  
(K1,310,000)



OL HAILANS PROVINS

Isten na Westen na Saten  
Hailans na Enga na Chimbu  
wantaim: 9 haus  
(K967,000)




## INVESTMENT CORPORATION OF PAPUA NEW GUINEA

YU KEN YUSIM MANI BILONG YU BILONG  
BAIM SEA INSAIT LONG BIKPELA KAMPANI

- Em i save helpim kantri.
- Em i save helpim yu tu.

Long olgeta beng yu ken kisim moa save long pasin bilong baim sea. O yu ken rait i kam stret long mipela hia:

Investment Corporation  
P.O. Box 155, Port Moresby



Poto antap i soim hetman bilong mipela long Rabaul, em John Darby, i toktok wantaim meri i bin baim sampela nupela sea.

Plis, yupela salim sampela tok save i kam long mi, long pasin bilong putim mani insait long Invesmen Koporesen Fan.

NEM: .....

ADRES: .....

.....

PASIN  
BILONG  
NUPELA  
TUMBUNA



SALUME!

LONG MONINGTAIM YOMBA I  
KIRAP. EM I HANGRE. NA EM  
I SINGAUT LONG MERI  
BILONG EM SALUME.



YU KUKIM  
KAIKAI  
O NOGAT?



WANEM  
KAIKAI?

ASTE SALUME. I GO LONG  
GATEN. TASOL GATEN I  
LAPUN TUMAS NA KAIKAI  
I PINIS.



OLAMAN! EM I  
KAM LONG GATEN  
BILONG YU YET



YU NO KEN  
WARI YU  
SMELIM  
KOMPOS

KOMPOS,  
EM WANEM  
SAMTING?



KOMPOS EM MARASIN  
MI YET I WOKIM, BILONG  
GIVIM GRIS LONG GRAUN



KAIKAI I PINIS,  
GATEN I LAPUN  
TUMAS.



NOGAT GRAUN  
MOA OLSEM  
OLGETA MAN HIA



TASOL MAVI I  
NARAKAIN.  
MAVI I GAT  
GUTPELA  
SINDAUN.

EM I WOKIM  
MARALA  
O WANEM?



PASTAIM MI  
WOKIM HUL



BIHAIN  
MI BUNGIM  
KAIN KAIN  
RABIS OLSEM  
LIP DWAI  
NA GRAS.



OLGETA SAVE STIN GUT.  
NAU MI PUTIM LONG HUL.




PEKPEK BILONG  
PIK, DOK NA  
KAKARUK I  
GUTPELA TU



NOGAT. EM I NO  
SAVE WOKIM  
MARALA.

OLSEM WANEM.  
NA EM I GAT  
PLANTI KAIKAI



ATING  
MI GO  
LUKIM  
MAVI



MONING  
KANDERE

MONING

YOMBA I GAT BIKPELA WARI. EM I NOGAT. KAIKAI,  
GRAUN I SOT NA LAPUN TUMAS. OLSEM LONG  
OLGETA ARAPELA MAN. TASOL MAVI I GAT PLANTI  
KAIKAI.



NA PEKPEK  
BILONG MAN

NOGAT



LARIM LONG  
STIN NA TANIM  
TANIM PLANTI TAIM



LUKAUT  
KOMPOS I NO  
KEN DRAI



TAIM EM STIN GUT,  
YU KEN TANIM LONG  
GRAUN NA PLANIM  
KAIKAI



YU MEKIM  
WANEM?

MI HANGRE  
NA MI LAIK  
WOK LONG  
GATEN.



YU GIAMAN KANDERE,  
YU GAT PLANTI  
KAIKAI TUMAS.



WANEM DISPELA SMEL  
NOGUT? NUS BILONG  
MI BAI BRUK. YA.




O YES, OLSEM NA  
KAIKAI I KAMAP  
NAMBAWAN TRU



NAU MI SAVE.  
EM BAI STRETIM  
WARI BILONG MI



OKE KANDERE  
YU TRAIM KAIKAI  
MI PLANIM WANTAIM  
KOMPOS



MAVI I NO WOKIM  
MARALA EM I GAT  
GUTPELA TINGTING  
TASOL.

EM TASOL



# OMBUDSMAN

## Arapela wok bilong Ombudsman

\* Poto i soim het ombudsman em **IGNATIUS KILAGE**. Em i man i gat bikpela skulsave na tu save long helpim ol-kain pipel.



Long las WANTOK niuspepa mipela i bin stori long wok bilong Ombudsman. Mipela i bin soim olsem, wok bilong Ombudsman em i bilong harim na stretim ol kros na wari i save kamap namel long ol pipel na ol ofisa bilong gavman o kain kain gavman dipatmen. Maski sapos em ol ofisa bilong nesanel gavman i stap long Moresby, o ol i bilong provinsal gavman, o ol i bilong loksai gavman.

Olgeta dispela samting i tru. Tasol dispela wok bilong harim na stretim ol wari, em i wanpela wok tasol bilong Ombudsman Komisin. Em i gat wanpela narapela bikpela wok tu. Em nau mipela i laik tokautim na mekim klia. Dispela wok em i bilong lukaut gut bai ol ofisa bilong gavman i mas bihainim "Lo Bilong Ol Lida".

"Lo Bilong Ol Lida" em i nem bilong wanpela hap bilong Konstitusen. Dispela lo i tokaut long wanem pasin ol lida bilong yumi i mas bihainim taim ol i wok insait long gavman. Em hia sampela lida i karamap long dispela lo:

- (1) Praim Minista na olgeta Minista bilong Gavman. Na tu namba wan na namba tu Lida Bilong Oposisen.
- (2) Olgeta Memba bilong Palamen.
- (3) Olgeta Provinsal Komisina.
- (4) Olgeta hetman bilong ol dipatmen bilong pablik sevis.
- (5) Olgeta hetman na olgeta memba bilong ol bot ov dai- rekta bilong ol spesel dipatmen olsem Nida na Lektrisiti Komisin na kain grup olsem.
- (6) Hetman bilong ol Polis. Hetman bilong ol Ami.
- (7) Olgeta tokman bilong P.N.G. long arapela kantri.
- (8) Olgeta manmeri i wok klostu na wantaim long Gavana Jeneral, wantaim long ol Minista, wantaim Lida Bilong Oposisen, na namba tu Lida Bilong Oposisen.
- (9) Olgeta kain jas na mejistret na bikjas na namba wan Mejistret bilong P.N.G.
- (10) Olgeta memba bilong Komisin bilong bosim ol ileksen na bilong Pablik Sevis Komisin na tu bilong Ombudsman Komisin yet.
- (11) Kuskus bilong Nesanel Palamen.
- (12) Auditor Jeneral - em man bilong glasim gut ol buk bilong olgeta ofis na lukim sapos olgeta tok na namba i stret o nogat.

Orait. Olgeta dispela kain pipel mipela i save kolim LIDA. Na tu ol i ken bringim sampela arapela ofisa na hetman bilong olgeta dipatmen i ken kam aninit long dispela Lo Bilong Ol Lida tu.

As bilong dispela Lidasip Lo em hia: bilong lukaut gut bai wanpela lida i no ken yusim pawa na strong bilong em insait long gavman bilong winim planti mani bilong pul- apim poket bilong em yet. Na sapos i gat tok long dispela samting, orait, Ombudsman Komisin i mas glasim gut.

Wanpela lo bilong olgeta lida em hia: wan wan i mas salim olgeta yia wanpela ripot i go long Ombudsman Komisin. Na insait long dispela ripot wan wan lida i mas tok save long Komisin em i save winim hamas mani long yia. Em i save kisim we dispela mani? Em i gat hamas bisnis na graun? Em i papa bilong wanem ol samting? Na em i insait long bisnis bilong wanem ol kampani?

Ombudsman Komisin i gat wok long glasim gut ol dispela ripot na painimaut ol i tru o nogat. Na em i mas lukaut tru sapos em i ken painim wanpela ofisa bilong gavman i yusim namba na nem na pawa bilong em bilong winim mani bilong poket bilong em stret. Em i pasin bilong man i save kisim grismani.

Bilong mekim dispela wok lukaut bilong em, Ombudsman Komisin i gat strong long holimpasim olgeta pepa na sek- buk na kain samting olsem bilong olgeta ofisa bilong gavman, bai em i ken sekap gut long ol. I no gat man i ken tambuim Ombudsman long mekim olsem.

Planti taim sampela pipel i save mekim stori nogut long ol lida. Klostu olgeta dispela kain tok i tok win nating. Em i wok bilong Ombudsman Komisin, em i mas strongim na helpim gutnem bilong olgeta lida. I nogut, man nating i ken tok nogut nating long ol lida na bagarapim gutnem bilong ol. Nogat.

Tasol sapos sampela man i gat kros tru o wari tru long pasin bilong wanpela lida, em i no mas haitim. Em i ken kam long Ombudsman. Na tu sapos em i lukim lida i mekim pasin nogut, o i save mekim bisnis i no stret.

Sapos wanpela man i pilim o em i save pinis, wanpela lida i bin mekim pasin i no stret, o i rong, em i ken ring long Ombudsman Komisin long namba: 25.2122 long Port Moresby yet. O em i ken kirap i go long ofis bilong Ombudsman i stap long Hubert Murray Haiwe long hap bilong Badi, long hapsait bilong Toba Motors.

Man i stap longwe long Port Moresby, em i ken rait i go long: **OMBUDSMAN KOMISIN**  
P.O. BOX 2123  
KONEDOBU

Komisin bai glasim gut na i painimaut, sapos i gat as tru bilong dispela wari o nogat. Na tu bai em i ripot bek long dispela man i bin bringim tok pinis.

## Gavman no ken baim moa ka

Minista bilong Transpot Wok na Saplai, Mista Bruce Jephcott i bin tok olsem, hap mani bilong yia 1975 na 1976 i bin i go tasol long Plen na Transpot Atoriti.

Mista Jephcott i bin tok olsem, mani bilong dispela yia i kamap K10 milien olgeta. Na ol dipatmen i bin yusim K8 milien tasol long mani bilong las yia, na i gat K2 milien stret i stap. Tasol nau nogat mani i stap.

Long dispela tasol, sampela dipatmen i no bin i gat mani tru bilong baim ka long Transpot Atoriti. Di-

patmen bilong Egrikalsa i bin givim K1.6 milien olgeta long baim ka bilong ol.

I no longtaim i go pinis, ol hetman bilong PTA na Dipatmen bilong Fainens, ol i bin toktok long stretim ol dispela wari. Ating sapos ol i putim wankain prais yet long baim ka, bai olgeta dipatmen i no gat inap mani namel long namba 24 de bilong mun Mas long dispela yia yet, na bai ol i no inap long baim ka bilong ol.

Mista Jephcott i bin tok olsem long taim, em i bin bekim askim bilong Oposisen.



Long namba 17 de bilong mun Mas, wanpela lain studen bilong Yunivesiti long Amerika i bin kamap long Port Moresby. Dispela grup "New Vision" singa i save mekim kain kain singsing lotu o kwaia long aidia bilong ol yet i bin go raun long Saut Pasifik. Ol i bin stap long Nu Silan inap 4-pela mun olgeta. Long Port Moresby, ol i bin go raun na singsing wantaim 7,000 pipel bilong siti. Bai ol i stap inap 2-pela mun long Papua Niugini.

Wanpela man i gat blakpela aiglas i sindaun insait namel long poto, em i David Walle. David em i tok em i bin lukim Kraiss long bilip bilong em. Em hia nem bilong ol studen i stap insait long poto: Dick na Londa Amundson, Ann McArthur, Deanne Chesley na Mel Eliason.

Dispela ol lain singa bai mekim lukluk raun long Port Moresby, Lae, Kaiapit, Kundiawa, Goroka, Maun Hagen, Wapenamanda, Madang, na Finschhafen. Bihain bai ol i go long Fiji, Samoa, na Hawaii. Long mun Jun bai ol i go bek long Amerika.



## Bank South Pacific the Personal Service Bank

WE LOOK AFTER YOUR NEEDS FOR :

- \* Cheque Accounts
- \* Pass Book Accounts - earning interest
- \* Interest Bearing Deposits, highest rates
- \* Overdrafts and Personal Loans
- \* Travellers' Cheques
- \* Full International Services

CONTACT OUR MANAGERS AT :

Main office: Port Moresby  
Branches: Boroko Mt. Hagen  
Kieta Kundiawa  
Lae Rabaul

DISPELA BENG BILONG SAUT PASIFIK I  
NAMBAWAN BILONG LUKAUTIM MANI BILONG YU.  
Yu traim ....

# Bank of South Pacific

Incorporated in Papua New Guinea

## TOYOTA TRAK

# OL DISPELA I NAMBAWAN TRU



TOYOTA  **ELA**  
MOTORS LIMITED

**Burns  
Philp**  
GROUP OF COMPANIES

# SEPIK NIUS



Poto antap i soim Et Pos Odeli Trening Skul long Timbunke long Sepik antap; em i sanap klostu long Rural Helt Trening Senta. Sister Mary Anthida i ranim tupela skul wantaim.

Long trening senta i gat 15. sumatin; ol i kam long 8 kaunsil eria bilong Sepik.

Skul i bin stat long Janueri 1976 na kos i ran wan yia stret. Bihain ol odeli i kisim trening long ol helt senta nabaut long Sepik na tu long dispela yia ol i mas raitim 40 kain kain pepa olsem eksemisen bilong ol.

Klasrum yu lukim long poto i bin kamap long helpim bilong Rural Impruvmen Fan na NSW Beng, na Lokal Gavman Kaunsil.

OLGETA IS SEPIK STUAKIPA I SAVE BAIM

KATON BINNEN BISKET

LONG WIRUI BAKSTUA TASOL



Binnen Bisket i kam long Madang.

Lukim ol prais hia:

Katon nevi bret = K6.50

Katon sis bisket = K7.50

Em i samting bilong PNG stret.

Katon Swit Moa = K7.50

## Pipel yet ranim peris

Em hia wanpela hap stori wantaim poto bilong Maranatha Peris long Sepik antap.

Long mun Mas, namba 3 na 4 de, mipela i bin i gat Maranatha Peris bot miting long Kanengara. Na long dispela miting mipela i bin toktok long konstitusen o lo bilong peris.

Maranatha Peris bot em i wanpela peris bot i gat ol memba bilong ol liklik peris bot gen, ol i stap insait long en. Mipela i gat 4-pela liklik peris long Maranatha peris, olsem Timbunke, Kapaimari, Amboin, na Kanengara. Long dispela ol liklik peris i gat ol liklik peris bot. Na long ol dispela peris bot 3-pela memba bilong wan wan i save i stap insait long Maranatha Peris bot long 2-pela taim tasol long wanpela yia. Long dispela peris bot olgeta pasta na pris pasto na 3-pela, 3-pela sios lida i stap insait. - Mi Otto Mey i ripot -



Long poto antap, kirap long lephan na yu lukim: Paslain: Felix Tisip, Fr. Ben Jansen, Otto Mey, Fr. Leo, na Moses Bundur.


Lain namel: Godfried Betino, Francis Yambui, Bruno Kmbra Dominic Niro, na Tiho Kante.

Lain antap: Paul Aknawi, August Lai, Tom Bowi, Paul Kambu, David Takos, Dominic Uli, Benny Menjawi, na Markus Nana.



Poto antap i soim ol liklik pukuk i stap insait long banis bilong SEPIK YUNAITET PUKPUK FAM long ples Yarakai klostu long Ambunti.

Insait long PNG ol fama i save askim planti taim nau, watpo ol i no ken kisim lektrik pawa i kam insait long ples bilong ol yet. Ol i lukim pawa bilong Ramu i go long ol biktaun na ol sampela fama i stap klostu long ol pawa lain, ol i save tok watpo pawa i go pas long mipela na mipela i no ken kisim? Ol i yusim wara long hap bilong mipela. Na tu taim gavman i tingting long putim pawa stesin long Musa na Purari na Stricklan Riva ol fama na viles pipel i bin askim gen, sapos ol tu bai kisim lektrik pawa. Olsem nau gavman i ting long mekim kain samting olsem na mipela long WANTOK wantaim Lektrik Komisin (ELCOM) i laik tok save long olkain aidia bilong dispela kain lektrik pawa i go long ol liklik viles na fama.



## LEKTRIK PAWA LONG FAMA

### PAWA I KOSTIM PLANTI MANI?

Nogat. Long bigin tasol ol man i yusim lektrik pawa i mas baim ol waia na mas i save karim na holim waia. Bihainbai prais bilong lektrik pawa i aninit long kos bilong kerosin.

### GAVMAN I TING WANEM?

Long yia i go pinis ELCOM i no gat mani bilong statim sampela lektrik projek olsem, long wanem kos bilong wel na bensin i bin go antap tumas na kaikaim olgeta profitmani bilong ol. Tasol nau long Epril ol i bin go lukluk raun wantaim lain saveman bilong sampela arapela kantri.

### ARAPELA KANTRI MEKIM WANEM?

Long Amerika ol i gat moa olsem 1000 liklik lektrik kampani bilong ol fama. Long Taiwan na long Filipin Ailan planti fama na liklik viles i gat lektrik pawa bilong ol stret. Ol saveman i ting long bihainim pasin bilong ol.

### YUMI KISIM MANI WE?

I gat sampela lain beng i laik tru long helpim kantri long kisim lektrik pawa. Wol Beng yet i bin lukluk raun long PNG long yia i go pinis, na em tu i tok mipela i mas bihainim pasin bilong Taiwan na Filipin Ailan. Na long Amerika i gat wanpela Ejensi bilong Developmen i bin statim 120 koprativ lektrik kampani insait long 10

kantri pinis, na olsem ol i bin helpim na mekim moa isi laip bilong 7 milien pipel.

### GAVMAN MAS MEKIM WANEM?

Hia yumi ken painim planti tri long bus na koltaim bai ol i ken sanap olsem mas na i stap longtaim moa. Yumi no mas baim ol pos ain.

Na tu gavman i ken mekim moa isi pasin bilong taitim ol waia insait long haus. Na tu gavman i ken baim planti ol swis na kiau samting bilong lait, na wan wan i no ken kostim planti.

Long Filipin Ailan ol i save trenim ol yangpela man insait long 4 mun long lukautim ol wok lektrik long viles na long waiaim haus.

### BAI GAVMAN STAT WE?

Gavman i ting long statim

Minista bilong Pablik Yutiliti, Mista Donatus Mola, i bin lukim olsem wanem ol Filipino i save yusim lektrik pawa long mekim wok bisnis bilong ol.

Olsem em i salim lain ofisa bilong ELCOM i go long Bougainville bilong painim we wara i ken wokim lektrik pawa olsem long Ramu.

Mista Mola i laik bai ol fama i ken mekim drai ol kopra na kakao long pawa tasol.

dispela lektrik pawa program long sampela ples i gat gutpela riva na tu i gat planti pipel wantaim. Olsem long Bougainville, Rabaul eria, na Milne Bay na Enga. Sapos i no gat riva, bai ol i yusim narapela pasin bilong kamapim lektrik pawa.

### YUPELA VILES PIPEL MAS TOK.

Em i samting bilong yupela ol fama na viles pipel i mas stat long toktok long lektrik pawa. Bai yupela i- nap mekim planti kain wok isi moa na i long prais i daunbilo tru. Bihain yumi toktok moa long dispela.

## ASKIM LONG NAMBAWAN TIN MIT GLOBE NA GREAT WORLD



## The Phantom

®

By Lee Falk and Sy Barry



### Edukesen wari

Provinsal Superintenden bilong Edukesen long Isten Hailans, Mista Timothy Poesi, i bin tokim ol memba bilong Edukesen Bot olsem Isten Hailans Provins i sot long ol tisa.

Isten Hailans Provins i mas gat 590 tisa olgeta insait long 139 praimer skul, 3-pela haiskul, na wanpela teknikal koles. Edukesen Bot i bin salim 496 tisa tasol i kam.

Long dispela tasol, namba bilong ol sumatin bilong 21 praimer skul i no bin i go antap liklik.

Long dispela yia ol studen bilong ol arapela provins, i stap long Goroka Teknikal Koles bai i no inap long go bek long ples bilong ol, long wanem, Teknikal Koles i sot long mani.

Sapos ol studen i no go bek long ples long Krismas, bai ol i lusim tingting tru long papamama na viles laip.

Na tu sapos ol studen i stap tasol long taun, bai ol inap long painim olkain trabel. Sapos ol i stap long Koles, bai ol i mas painim kaikai bilong ol yet.

Edukesen Bot i sot tru long ol mani, olsem na nau i gat 16 tisa i stap nating na i no samting bilong mekim long dispela yia.


### Hailans Haiwe

Minista bilong Transpot na Woks, Mista Bruce Jephcott, i bin tok olsem, long mun Julai bai ol inap kisim dinau mani long Wol Beng long koltaim Hailans Haiwe.

Mista Joseph Iuanga bilong Kundiawa, i bin tok, Kl milien em ol i bin makim long mekim wok bilong Hailans Haiwe long yia 1974/75 i no inap tru.

Planti ol han rot i stap klostu long ol viles i no gutpela tru, na tu ol rot i save bagarap olgeta long taim bilong bikpela ren.

Mista Jephcott i bin tok tu olsem, kos bilong bensin na ol arapela samting olsem i bin mekim hat liklik long kisim dinau mani hariap.



Mista Pato Kakarya

### baim kopi gut

Memba bilong Wapenamanda Open, Mista Pato Kakarya, i bin tok olsem, prais bilong kopi i bin go antap olsem 85 toea long wanpela kilogram. Long dispela tasol, ol pipel bilong planim kopi nau i tingting long mekim bikpela profit moa long kopi bilong ol.

Em i bin tok tu olsem, wanem ol kampani igat planti trak na wokman i mas salim kopi long prais bilong en stret. Olsem tasol bai ol pipel i ken kisim profit long taim ol i salim long ol bikpela kampani.

Planti taim ol papa bilong ol trak i save go raun na baim kopi long liklik prais tasol. Na taim ol i salim long ol bikpela kampani, ol kampani ya i save kisim bikpela mani moa. Tasol tarangu ol pipel bilong planim kopi i no save kisim profit.

Mista Kakarya i bin tok tu olsem, ol pipel bilong planim kopi i no bilong ol arapela kantri, olsem na yumi mas i stap wankain tasol. Yumi no ken mekim ol olsem rabisman na stilim mani bilong ol.

Long pinisim olkain wari olsem skul fi, kaunsil takis, klos, na baim ol kaikai long ol stua, ol pipel i mas wok hat na planim planti kopi moa, olsem tasol bai ol inap long baim ol samting ol i gat laik long en.

Na tu Mista Kakarya i bin tok, sapos Gavman i painim wanem man i baim kopi long liklik prais, bai em i mas go kot long dispela.

### Kainantu bai pinisim takis

Insait long kibung bilong Kainantu Lokal Gavman Kaunsin long las mun, presiden bilong dispela kaunsil, Mista Jurain Bolong i bin tok olsem, bihain long 1975 na 1976 mani yia, kaunsil bai i no inap long kisim takis mani i kam long ol pipel.

Kaunsil i bin putim dispela aidia, long wanem, nau i gat 35 eria komyuniti, o viles gavman, na 19 viles kot long Kainantu eria yet.

Na kaunsil i laikim bai ol eria komyuniti yet i mas kisim takis mani long ol pipel. Em i olsem "Selp Rilaiens". Sapos husat i no baim takis, bai em i mas go stret long viles kot yet.

Ol eria komyuniti i bin tok orait pinis olsem, ol pipel i ken baim K7, o K3, long dispela takis hia.

Mista Bolong i bin tokim ol kaunsila olsem, bai ol i mas givim bek K88,000 i go long ol pipel. Na tu em i tok olsem, dispela samting kaunsil i mekim, bai ol pipel bilong en i amamas tru.

Spika bilong Nesenel Palamen, Mista Barry Holloway i bin tokim dispela kibung olsem, em i amamas tru long gutpela wok ol kaunsil i mekim nau long Isten Hailans Provins. Na dispela i soim selp rilaiens long ol pipel bilong Papua Niugini.

Em i tok yumi no ken wetim gavman tasol long mekim olgeta wok long mipela. Nogat tru. Nau yumi yet i mas wokim ol rot, kirapim ol nupela helt senta, wokim ol kain kain bisnis, na ol arapela wok olsem long gohetim ol wan wan eria bilong mipela long bihaintaim.

### Saten Hailans op moa nau

Taim Mista Julius Chan, Minista Bilong Fainens i bin opim Erave Bris long Saten Hailans Provins, em i tok em i wanpela gutpela eksampel bilong tingting bilong gavman long helpim ol ples longwe long ol taun. Nau ol trak na PMV i ken kirap long Erave na go long Kagua na planti arapela ples. Em i min olsem: nau ol kaikai i kamap long ol stua i no kostim planti; tasol ol pipel bilong ples i ken winim moa mani nau long ol samting bilong gaden long wanem ol inap nau long bringim i kamap long ol maket na ol biktaun.

Long dispela taim Mista Chan i bin autim wanpela bikpela na strongpela tingting: Gavman Rural Development Plan i laik helpim ol ples, tasol ol yet i mas putim sampela mani bilong ol i go insait. Sapos nogat, gavman bai les.

## BAIM WANTOK

Sapos yu wanpela yu laik kisim WANTOK i kam long yu stret, orait yu salim dispela tiket i kam:

Mi laik kisim WANTOK niuspapa inap wan yia olgeta. Nau mi salim K5 (\$5.00) i kam;

Nem: .....

Adres: .....

.....

Salim i kam long:

WANTOK - P.O. BOX 396 - WEWAK

Poto long raithan i soim Mis Flora Ungaia bilong Papua Niugini i sanap long raithan kona tru na toktok wantaim Mista Ed Parr bilong Perth, Australia, long lephan, na Misis Pratima Singh bilong Fiji, em i sanap i stap long namel. Ol i stap long Teknoloji bilong Institut long Perth yet.

Long namba 15 de bilong mun Mas, ol i bin statim wanpela kos bilong ol pipel i save wok long ol haus buk long biktaun Perth, long Westen Australia. Kos hia bai i stap inap 10-pela wik olgeta na nau i gat 15 pipel bilong 13 kantri i mekim stadi bilong ol i stap.

Wanpela lain bilong Australia ol i kolim ol, Australian Developmen Asistens Ejensi i ranim dispela kos.

Long sampela taim bai ol lain ya i go lukim ol sampela haus buk bilong Perth.

Olsem tasol, PNG i bin salim Flora Ungaia i save wok long haus buk bilong ol ami long Port Moresby long dispela kos. Em wantaim ol wantrening bilong em ol i wok long lainim planti ol nupela kain kain we bilong bosim na lukautim ol haus buk long kantri bilong ol.



Poto long lephan i soim nupela Lod Mea o hetman bilong Brisbane, Australia, Mista Alderman Frank Sleenman, long lephan, na long fran bilong em, em i Dokta Reuben Taureka, Minista bilong Infomesen na Brotkas-ing bilong yumi long PNG.

Tupela wantaim i wok long lukluk long ol sampela piksa bilong Namba Tu bikpela pait em ol i bin kisim bipo long Papua Niugini. Tasol, tupela bikman hia i stap insait long wanpela bikpela haus long Brisbane, we ol i wokim wanpela kain so em i makim Papua Niugini Nau long ol piksa bilong taim bilong namba 2 bikpela pait.

Long nait bilong 21 de bilong mun i go pinis, Dokta Reuben Taureka i bin opim dispela so long Brisbane. So hia i bin pinis long namba 1 de bilong dispela mun. Samting olsem klostu 1 milien pipel bilong Brisbane i go lukim dispela so.

Insait long dispela bikpela bung bilong ol, 150 ol kain kain lida, ol politisen, na ol bikpela bisnisman wantaim ol meri pikinini bilong ol tu i bin stap. Lukim gut ol piksa bilong namba tu pait long poto hia.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.